

MANE A8IAK EKITOTC
ANICINAPE KAPI ICI PIMATISITC

OO8E MASINAIKAN KA OCITCIKATEK, NA8ATC KITCI
NISITOTCIKATEK ACITC KITCI MINOTAK8AK ANICINAPE
OTICIT8A8IN. MANE A8IAKOK KI OCIIPIIKE8AK KITCI
8ITAMAKE8ATC ATI 8INA8A ECINAMO8ATC NOKOM ANICINAPE
ECI PIMATISITC.

21 MITASOMITANA PIPON

MI OKO8E KA OCITO8ATC OO MASINAIKAN

Naomi Fontaine

Marie-Andrée Gill

Élisabeth Kaine

Jeanne-D'Arc Vollant

Christine Sioui Wawanoloath

© LA BOÎTE ROUGE VIF

Traduit du français par France Mowatt (communauté de Pikogan).

OO KE MIKOTCIKATEK

8ECKATC KAPI ICISEK ATISOKATCIKATE. KA 8APISITC ETA KA INATISOKETC OCIIPIIKATE. MI MAIA 8INA8A KAPI TIPENTAMO8ATC AKINI ENITAK8AK. KITCI PAKI ETA MASINASO8AK ANICINAPEK 8ECKATC ATISOKANI MASINAIKANIKAK. MATAMINAK E KITIKE8ATC, KOTAKIAK TAC E ANOKI8ATC ACITC MINAN E MA8ISO8ATC. 8AIANAN E AKOKENTCIN OTITIMANI8AKAK ACITC MANITOKI8INI E KIKEI8ETC. NANTAM ACITC PIKOKANAN ACITC 8AKINOKAN ECI TACIKE8ATC. ACITC NANTAM KA KIN8AKIN NIPAKANAN E OKO TACIKE8ATC ANICINAPEK. MI ETA ENASINASO8ATC, MOTCI MAMITONENTCIKATE ATI ECI PIMATISI8AKOPANEN, PAKAN MEKA ICINAK8ANOPAN OPIMATISI8INI8A. KA8IN ANI8AK KEKON OCIIPIIKATESINON 8ECKATC ENATISOKASO8ATC.

8ECKATC ANICINAPE KITCI KI ATISOKASOTC KAPI ICITATC MAIA NI8I KANA8APATANANAN EKA MAMAKATC KACKENTAMO8IN KITCI MIKA8INANI8AK. KITCI KIKENTAK8AK EKI TAK8AK 8ECKATC PIMATISI8IN, A8IAKOK EKI TE8ATC KITCI WECKATC. OO8E TAC KA OCIIPIIKATEK ATISOKAN, 8ITAMAKEMAKAN EKI TAK8AK KITCI 8ECKATC PIMATISI8IN OOMA AKIKAK, KITCIKAMIKAK ACITC A8IAKOK ECI PIMATISI8ATC. NI8I

8APATAI8EMIN MEKA A8ENENI8IAK ACITC NI8I 8ITAMAKEMIN ATI ECI
OTAKANESIAK. KA8IN KAKINA KEKON 8APATCIKATESINON 8ECKATC
ENATISOKASOTC ANICINAPE. KI KITCI MACKA8ISI8AKOPAN, KI KITCI
SOKI PIMATISI8AKOPAN ACITC KI KITCI SOKITEE8AKOPAN. MITAC
KEKAPITC OKI ANI OTAPINANA8A E ATCISENIK OPIMATISI8INI8A.

NI8I MANIPITONANAN KA 8ANIKANAKANI8I8ATC ANICINAPEK. KITCI
IKITONANI8AK, KITCI MATINAMATINANI8AK. KEKINA8IT ANICINAPEK ECI
PIMATISI8AKOPANEN KITCI OCIIPIIKATEK NOKOM. NI8I 8ITCII8EMIN
KAKINA A8IAK KITCI KIKENTAK. KITCI NAK8AK PIMATISI8INIKAK E
TE8ATC ANICINAPEK. KITCI PAPISISKENIMIKO8AK KINA8IT ANICINAPEK
OOMA AKIKAK, AKIKAK MEKA KITOTCIMIN.

TAPICKOTC EPIPAKIAK KITCI ICINAK8AK KITCI 8ITAMAKEIAK : KINA8IT E
TEIAK. KINA8ITINAKAK MEKA PEPEK8ATC TACIOMAKAN APENIMO8IN.
ICINAK8AN TAC KINA8IT KITCI ICITO8AK.

MANE ENAKANESINANI8AK KITCI 8ITCI TACIKEMITINANI8AK NOKOM ECI
PIMATISINANI8AK.

AKI

SANAKAN KITCI NENICIKEPITCIKATEK KEKON, TAPICKOTC KITCI 8ECKATC MITIK, KITCI ANIKE 8ATAPI8I ACITC KITCI SOKAKICIN, KA8IN KACKIAKANI8ISI KITCI NISAKANI8ITC. MI ECISEK KEKINA8IT KA ENAKANE8ISIAK, NOPIMIK OTCIMAKAN KITCI ANIKOSEIAK. MI MAIA ANICA INAPATAMO8IN ENENTAK8AK, EKA KA PAPISISKENTCIKATEK, MIKOTC KAPE KAPI ICINAKOSIAK INENTAMOK ANICINAPEK. PEKIC TAC, TEP8E KI TAK8ANON KITCI ANIKOSEIAK ECI OTAKANESIAK, MI IIMA ATISOKAN 8ETCIMAkak KITCI ANI 8ITAMAKEMAKAK KITCI 8ECKATC ANICINAPE KAPI ICI PIMATISITC.

ECI PIMATISIAK KINA8IT ANICINAPEK 8ITAMAKEMAKAN E KITAPATAMAK (APITENTAMAK) KITICIT8A8INAN, ACITC MAMAW ECITCIKEIAK ACITC ENENTAMAK. KEKON KA APITENTAK8AK KI NIKANATONANAN TAPICKOTC MANATCII8E8IN, 8ITOKOTATI8IN ACITC MATINAMATI8IN. MANE KI KACKI 8ITANANAN KIT ICIKIC8E8INAN A APATCITO8AK. OCKATOK, KAKINA MA8ASAK8INOPANIK E 8ITCI TACIKEMITI8ATC ANICINAPEK. KA8IN PAKAN ICI PIMATISISIPANIK. NIKI ONATONANAN ATI KE ICI TACIKEIAK NITICIT8A8INAN KITCI NOS8A8ATO8AK, KITCI 8ITCI TACIKEMIAK NI

TCINA8EMAKANANAN. ATI ECI NTA8ENTAMAK KITC ICI OPIKI8ATC
NITAPINOTCICIMINANAK. ATI KE ICI MINO TACIKEIAK ACITC AKIKAK KE
ICI TIPENTAKOSIAK (KITCI INENTAMAK). MISA8ATC TAC EKA KIAPATC ICI
TACIKEIAK KITAKIMINAKAK 8ETI NOPIMIK, KINA8ITINAKAK
TACIOMAKAN, KITCI 8ECKATC MEKA ACA KIPI TACIKE8AK KITANIKE KITCI
ANICINAPEMINANAK.

AKI KA ICINIKATEK, MI MAIA ONIPE8INI8A EPITENTAMO8ATC KAKINA
ANICINAPEK : MI IIMA MEKA ECI TIPENTAMOMAKAK, KITICIT8A8INAN,
KITATISONANAN, KITICIKIC8E8INAN, ECI TEP8ETAMAK, ECI PIMATISIAK
ACITC ECINIKANIKO8AK. KAKINA II KI MA8ASAKOSEMIN. AKI 8IN, ECI
PIMATISIAK ACITC ICIT8A8IN INAPATAN KITCI KANA8ENTAMAK. NOKOM
TAC PAKAN KITINAPATCITONANAN AKI, MI MEKA IIMA 8ETINAMAK KITCI
MACKA8ISIAK, KITCI SOKITEEIAK, EKA KITCI EN8ENTCIKEIAK KITCI
MIKATAMAKONIN KITCI KANA8ENTAMAK ENENTAKOSINANI8AK KITCI
AIAMAK, KITICIKIC8E8INAN, KITICIT8A8INAN, ACITC SA KINA8IT
ECINAK8AK KI PIMATISI8INAN.

MISA KICPIN PECIK KEKON MA8ATCI KE KITCI MIKITCIKATEKIPAN, MI
OO8E : KITCI MANATCITCIKATEK NOPIMIK, KITCI MINO MA8ASAKO
TACIKANI8AK OOMA AKIK ACITC A8IAKOK ACITC A8ESISAK. MI MEKA
ECINAK8AK KITACIKE8INAN. KITCI ACO8I MIKI8ANI8AK ACITC KIN8EC
KITCI KI TACI APATAK.

KA8IN 8IKAT KITOTCI INENTASINANAPAN KITCI TIPENTAMAK OO AKI
ACITC KAKINA KEKON NOPIMIK KA ICI TAK8AK. AKIKAK KITICI
TIPENTAKOSIMIN KIKI INENTANANAN, KA8IN 8IN PAKAN KITICI
TIPENTAKOSISIMIN. KA8IN KEK8AN KITIPENTASINANAN KAKINA KOTAK
KEKON. ANIC KINA8IT ICINAK8AN KITCI MIKITAMAK KITCI NAK8AK ECI
TACIKEIAK ACITC KITCI MINO 8ITCI MIKIMOMITIAK. KA8IN ANI8AK A8IAK
NA8ATC ICPENTAKOSISI APITC 8IN KOTAK A8IAK. KAKINA PEPECIK A8IAK
KEKON INAPATISI ATIKOTC ETATC. KA8IN KI TIPENTASINANANAN NIPI
ACITC AKI, TAPICKOTC KEK8AN A8IAK KA NAKATCIATCIN « WAMPON »
KITCIPISON KA ICINIKASOTC, KA8IN OTIPENIMASIN INI KITCIPISONAN.
ICINAKOSI MEKA 8AA KITCI MANATCIATCIN ACITC KITCI ACO8I MIKI8ETC
ECI KIKENTAK.

APITC AKO NOPIMIK ICANI8AK, MI MAIA KA KI8EIAK KI MIKI8AMINAKAK
ENENTAMAK. KAKINA MEKA KEKON AKIKAK KITOTINANANAN; KE ICI
TACIKANI8AK, MACKIKI, ACITC MITCIM. MI 8ETINAMAK KITCI OTCI
PIMATCIO8AK ACITC KITCI ICI PIMATISIAK. MI IIMA ECI OTAKANESIAK.
MITAC 8ETCI KITCI APITENTAK8AK KITCI MANATCITCIKATEK AKI, NIPI
ACITC KAKINA KEKON NOPIMIK. MI ACITC 8ETINAMAK KITICIT8A8INAN.
KITCI PIMATCIONANI8AK INAPATAN OO AKI, KA8IN 8IN ETA KITCI
OTINIKATEK KE MITCIKATEK, KONI NOPIMIK KITIKANAN OTCI, MI ACITC
MACKIKI 8ETINIKATEK, 8A8ATC A8ESISIKAK OTINIKATE MACKIKI. NIPI
ACITC KITCI KITAPATAN : MI II 8ECKATC MIKANAN MI ACITC
8ETINIKATEK KITCI 8ISINIAK. PANIMA TAC KATA MANATCITCIKATE8AN
INI KAKINA.

MOCAC 8ANIKANI8AN ATI EPITCI SANAKAKIPAN AKO 8ECKATC KITCI
PIMATCIONANI8AK. KITCI AIEKOSIPANIK, KA8INA8IPANIK AKO. KAPE
MIKITCIKATE KITCI PIMATCIO8ATC. NANTAM KA8IN TIPISESIPANIK KITCI
MINOPIMATISI8ATC. E PIPOK E KITCI TAKAIAK, ACITC E
KA8ASKATE8AKOPANEN. KA CAKOSI8ATC ONISIKONA8A E KITCI
TAKAIANIK. TCITCICAK NANTA NIPO8AK E NTA8IKI8ATC OSAM EKA

K8AIAK TIPISE E MANATCIITISO8ATC. ACITC NANTAM IK8E8AK NIPO8AK
E NTA8IKINTCIN OTCITCICIMAN. MANE KI TE8AK KI8ACICANAK II APITC.
MANE ACITC KAKINA PECIKOTENA OKI NISIKONA8A KOTAK AKOSI8INI
EKI TAK8AK.

KI8ACK8E8AK KITA INENIMIKOMIN KICPIN K8AK8E KOKI ICI PIMATISIAK
8ECKATC KA ICI PIMATISI8APAN KITANIKE KITCI ANICINAPEMINANAK.
KA8IN KIKENTAK8ASINON INIKIK KAPI INENTCIKE8ATC 8ECKATC
ANICINAPEK. INIKIK KAKINA KAPI ICI PIMOSATAMO8ATC KITCI KI
PIMATCIO8ATC. KAKINA KAPI ANIMENTCIKE8ATC KITCI K8AK8E
PIMATCIO8ATC ACITC KAPI NAKATAMO8ATC. KINA8IT KI
NAKATAMAKOMIN ECI KACKITO8ATC ICINAK8AN.

II NOPIMIK KA MIKOTCIKATEK, MI KAPE KAPI ICI TACIKE8ATC KITANIKE
KITCI ANICINAPEMINANAK, NIO MITASOMITANA8E(400) PIPON
OTAKANAK KITCI 8ECKATC. KEKATIKOTC PECIK KITCI MITASOMITANA8E
PIPON OTAKANAK INIKIK INAKITCIKATE II. PIK8ATINAN KA PAPA ICA8AK,
SIPIN KI PAPAMAK8ACI8E8AK. INIKIK KAKINA KAPI ICI MAMITA8ISE8ATC
ACITC INIKIK KAPI ICI PIMOSATAMO8ATC KIAPATC NOKOM

KITAPATCITONANAN EKI KIKINA8ATCITCIKE8ATC. EKI PAPA ICA8ATC
ACITC EKI PAPA TACIKE8ATC NOPIMIK 8ECKATC MI NOKOM 8ETCI
KACKITO8AK KEKINA8IT KITCI KOPAAMAK KITCI NTA KOKI OTAPINAMAK
KITANICINAPE PIMATISI8INAN. EKI ANOKI8ATC, EKI
PAPAMAK8ACI8E8ATC ACITC EKI NISA8ATCIN A8ESISAK MI NOKOM
KIAPATC 8ETCI ICAIAK NOPIMIK, MI 8ETCI TAK8AKIN KITANOKI
AKIMINANAN. APITC TAC ICISEK KITCI KOPINANI8AK, E PIPOK, KITCI
NTOTAMAN E PEKATAK, KONI E KITCI NOTIK MEK8A PIPON, PITIKAMIK
MISATIKOKI8AMIKAK, KA8IN KITA 8ANIKESIMIN INIKIK KAPI
INENTCIKE8ATC KITCI 8ECKATC KITANIKE KITCI ANICINAPEMINANAK. MI
MEKA 8ETATAPIKICINIAK KAKINA. MI ACITC 8ETCI SAKITO8AK
KITAKINAN.

ANOKI8INNI – MA8ISO8INNI

KA8IN KI TIPENIMASINANAK A8ESISAK. KAPE KIKI PI MANATCIANANAK, EKI PI ATISOKANAKANIO8ATC ACITC EKI ACITAKIMAKANIO8ATC KITICIT8A8INAKAK. 8ECKATC ANICINAPEK OKI APATCIA8AN A8ESISAN KITCI ICI 8INTISO8ATC EPITCI APITENIMA8APANIN. A8IAK ENATISITC KI ICI TIPAAKE8AK A8ESISIKAK KITCI ICINIKANTISO8ATC. OKI MANATCIA8AN ACITC A8ESISAN APITC E NTAOO8ATC KONI E NTA MOS8E8ATC. MIK8ETC ENENIMA8ATCIN. MAIA APITC MEKA TAK8AN KITCI NTAOONANI8AK, ACITC MIK8ETC KITCI INENTCIKATEK A8ESIS EKI NISAKANI8ITC. KA8IN INENTAK8ASINON KITCI NISATC A8ESIS MEK8ATC E OTANAMATESITC (E OTAIASIMITC), NOKOM MEKA MI E KITCI TOTAK KA 8APISITC APITC AKO E NTAMOS8ANI8AK, O8ANATCIAN A8ESISAK APITC 8I OTAIASIMITC. OKIKENTAN MEKA A8ESIS, APITC ANI NOTESANI8AK MITCIMINI. MINTISO KITCI ACAMATCIN A8IAKON, MIKI8E OPIMATISI8IN ICINAK8AN.

KIAPATC NOKOM, KINTAOOMIN ACITC KI PAKITA8AMIN MITCIM KITCI TAK8AK, KITCI PIMATCITO8AK KIT ICIT8A8INAN ACITC KIAPATC NANTAM OPIMATCIIKONA8A II MITCIMINI. KIAPATC ACITC APATAN APITC A8ESIS

NISAKANI8ITC, ANICINAPE KACKIK8ASO8IN OTINIKATE, A8ESISIKAK
MEKA OTINAKANI8I PACK8EKIN E OCITCIKATEK KEKON. MITAC KITA
MIKITANANAN KITCI MANATCITCIKATEK NOPIMIK ACITC KITCI
MANATCIAKANIO8ATC A8ESISAK APITC 8I OTAIASIMI8ATC. ANOKI8INNI
MEKA INENTAKOSI KITCI KIKENTAK ATI ENATISINTCIN EKA KITCI
TCAKIATCIN KAKINA KA AINAKANESINTCIN A8ESISAN.

NANTAM ANOKI8INNIK MATINAMAKE O 8ITCI ANICINAPEMAN 8IASINI
APITC OTCI NISATCIN A8ESISAN. MISA8ATC NOKOM ACA
MACKA8ATCITCIKAN E APATAK KIN8EC KITCI KANA8ENTCIKATEK 8IAS,
ANI ATCISE PAKI ENATISI8ATC A8IAKOK. PEKIC KIAPATC NANTAM
MATINAMATI8AK 8IASINI O PECIKOTENAMI8AKAK. MITAC KE8INA8A
KITCI ANICINAPE KITCI KACKITO8ATC ANICINAPE MITCIM KITCI
INATCIKE8ATC, KA8IN 8IKAT 8ANIKANAKANI8ISI8AK.

KINA8IT E TOTAMAK, KA8IN KEKON KI 8ANATCITOSINANAN APITC
NISAKANI8ITC A8ESIS. MISI8E KOTC KA INIKINITC AA A8ESIS APATISI.
KAKINA ECI TAK8AK ATIKOKAK KONI MOSOKAK MITCIKATE. MI MAIA

MAIKANAK KA TOTAMO8ATC, KAKINA KEKON OTCAKATANA8A. MISI8ENA
8IAS MITCIKATE.

NOKOM ECISEK, NANTAM MI ECI 8EPINIKATEKIN, A8ESISI OKANAN EKI
NISAKANI8ITC, OSA OTENAK E TACIKANI8AK 8ETCI ICISEK II. MI ECI
8EPINA8ATCIN A8ESISAN EKI NISA8ATCIN NANTAM NTAMOS8E8INNIK. O
KITCI 8ANATCIA8AN TAC. NI KACKENTAMIIKONANAN. 8ATAN ACITC APITC
AKO MOS OCTIK8AN ATCIKATEK 8AKITC OTAPANIKAK, MI MAIA KA
MANENIMA8ATCIN INI A8ESISAN ENENTAMAK NINA8IT. KA8IN
MANATCIAKANI8ISI 8AA A8ESIS EKI MIKI8ETC OPIMATISI8IN.

TEP8ETAMO8IN

E NTA8IKINANI8AK PINICI KITCI NIPONANI8AK, KIKI MINIKOMIN PIMATISI8IN. MITAC OO MA8ATCI ENIKANENTAK8AK : KITCI PIMATISIMAKANIK OMANTOMAN A8IAK EKI NIPOTC, MI ECI TIPAAKANI8AK E PIMATISINANI8AK. KITCI KANA8ENTCIKATENIK E MIK8ENIMAKANI8ITC TAPICKOTC KITCI TACI PAKAANIK OMANTOMAN TE8EIKANIKAK.

A8IAK APATCIATCIN TE8EIKANAN, PANIMA OKA MANATCIAN, EKA KITCI PAMENTAK KA MINIK8ETENIK KONI MATCI MACKIKINI. PANIMA KITCI PAIEKANIK OPIMATISI8IN KITCI KI KIKENTAK ANECINAKOSINTCIN OMANTOMAN ATI KAPI OTAKANESINTCIN O TCINA8EMAKANAN. KIT APATCIANAN TE8EIKAN KITCI TACI PIMATISIAK. KI PAPATIKE8ANAN 8AA TE8AIKAN KIAPATC KITCI NOTCIKATEK ACITC KITCI NISITOTAKO8AK ECI NTA8ENTAMAK KI PIMATISI8INAKAK, NOKOM E PIMATISINANI8AK.

MANE OTACI MITIKANA8A KITCI KOKI MA8ASAK8ATCIKATEKIN KITCI 8ECKATC KITANIKE KITCI ANICINAPE OTCIPAI OKANANI8AN, INI8E KA TACI KANA8ENTCIKATEKIN KITCI KIKINOAMATI MIKI8AMIKAK, KONI

KITCI 8ECKATC KEKONAN KA ICI KANA8ENTCIKATEKIN. NI8I KOKI
KI8E8ITONANANAN KA ICI TACIKEIAK. 8IPATC II NI8I MIKITANANAN.
KA8IN MEKA K8AIAK ICINAK8ASINON KITCI 8ANIKANAKANIO8ATC IKI KI
TCINA8EMAKANANAK.

ATISOKANAN, KAPI INATISOKANI8AK, ACITC ANICA

ATISOKANAN KA MATCITAMAKAKIN

MISA8ATC PAPEKAN ENAKANESIAK E ANICINAPE8IAK. KAKINA TAPIKOTC
A8ESISAK KIT INENTAKOSIMIN. KAKINA MEKA NOPIMIK ICI PIMATISI8AK.
ATI KOTC 8ETATAPIKICINIAK, KAPE A8ESIS ATISOKANAN KIPI TAK8AN. KI
ATISOKASO MAK8A, MAIKAN, KAK, KAKAKI KONI ACITC KITCIKAMI KIKOS.
KAKINA PEPAKAN KITAIANANAN A8ESISI ATISOKAN, ATI
ECINIKANAKANI8ITC, ENATISITC ACITC ECI MACKA8ISITC 8AA A8ESIS
TAC ICI TIPAAKANI8AN APITC ATISOKASOTC.

NANTAM ANICINAPE IKITO8AK : A8ESISIKAK KIKI PI OTAKANESIMIN,
A8ESISIKAK KITICI OTATAPIKICINOMIN. MITAC PEPAKAN 8ETCI KI
INAKANESIAK E ANICINAPE8IAK A8ESISIKAK EKI ICI TIPAAKANI8AK : ATI
ENATISITC, ECI KACKITOTC, ECI MACKA8ISI8ATISITC A8ESIS. NANTAM
ATISOKANAN TIPATCIMOMAKANON A8ESISI OMANITOM APATISI KITICI
OTCI PIMATCIO8AK.

A8ESISIKAK MEKA KAKINA KEKON KI OTCI MATCITAMAKAN. 8IN A8ESIS
KI MINTISO KITCI PIMATCIO8AK, KIKI KIKINOAMAKE ACITC
MACKA8ISI8IN KIPI MIKI8E.

KA8IN MAIA TEP8EMAKASINON ATISOKAN. TAPICKOTC INAPATAMO8IN
ICINAK8AN. A8IAK OMITONENTCIKANIKAK ICI TAK8ANI ACITC MITAC ECI
MASINAAK. KITCI 8ECKATC TAPICKOTC INENIMAKANI8IPANIK A8IAKOK
ACITC A8ESISAK, MI KAKINA 8ETCIMAKAK ATISOKAN. MIKOTC KAPE KAPI
ICISEK : MANITOKAK OTCIMAKAN, EPI TAKOCINO8ATC KONI E
MATCA8ATC. KA8IN TEP8E ICISESINON EPIMATISINANI8AK, NANIKOTIN
OSAMATCIMONANI8AN E ATISOKANI8AK MIKOTC ETA A8IAK KITCI
MAMITONENTAK.

PEKIC SA PIMATISIMAKAN ATISOKAN INENTAK8AN. KI KIKINOAMAKOMIN
KITCI KIKENTAMAK KE ICI KIKENTAMAKOPAN. TIPATCIMOMAKAN
A8ENENI8IAK IKI KAPI TE8ATC OCKATOK, KA MAMATA8ISI KACKITO8ATC,
KI 8ITCI8AKANANAK, KA MATCENIMIKO8AK ACITC 8ITAMAKEMAKAN ATI
ECI TANI8AK AKIKAK ACITC 8AK8IKAK. MANITOKAK ICI O8ITCI8AKANI,
KAKITA8ENTAMO8IN ACITC MITONENTCIKANIKAK ICI 8ITCIKI8EMAKAN.

NANIKOTIN KOTASITAK8AN, NANIKOTIN A8IASITAK8AN, SEKISITAK8AN
KONI SOKITECKAKEMAKAN. NANIKOTIN 8ITAMAKEMAKAN ECISEK
PIMATISI8IN, KONI KAKINA8ICKITAK8AN, MIKOCKATCITAK8AN, KA8IN
AKASITAK8ASINON, KITCI TEP8ETCIKATEK KONI KITCI EKA
PAPISISKENTCIKATEK KEKON II 8ETCI TAK8AKIN. MANE KEKON OTCI
TAK8AN II ATISOKAN, NANIKOTIN MIN8ACIN, NANIKOTIN KA8IN.

APATAN PEKIC II ATISOKAN. KA8IN TAC PEKIC KATA
MIN8ENTAK8ASINOPAN INI EKA TAK8AKIPANIN : ATISOKAN
MINOTAK8AN, MAMAKASITAK8AN, KACKENTAK8AN, ACITC
8ITAMAKEMAKAN KEKON KITCI KIKENTAMAN.

TAPICKOTC MITIKOK PEPAKAN KA ECINIKASO8ATC MI ACITC ECISEKIN
ATISOKANAN, MANE8EEK INATISOKATCIKATE APITC KA KICENTCIK8AK
AKI. MISA8ATC TAC KEKAT KAKINA TAPICKOTC INITAK8ANON. E TASO
OTAKANESIAK MEKA ACITC PEPAKAN KA TACIKE8ATC ANICINAPEN
KAKINA PEPECIKOTENA OTAIANA8A OTATISOKANI8A.

KITCI PEPAKAN KEKON ATISOKATCIKATE : MIKOTCIKATE : E
KICENTAK8AK AKI, ACITC ANOTC 8ETI KOTAKIAN AKIN, MATCENIMITI8IN
ACITC MIKATI8IN, SAKIITI8IN, 8ANATISI8IN, OKACAKIMI8IN,
KITIMI8IN, PANAAKE8IN, KIMOTI8IN, KOKOTCI, KA MAIAKISITC A8ESIS,
MANTOKE8IN, KIKE8I8IN, A8ESIS KA MINO TOTAKETC KONI KA MATCI
TOTAKETC, KITIKAN KA MACKIKI8I8ETC.

INI TAC ATISOKANAN, TIPATCIMOMAKANON A8ENENI8IAK KINA8IT. ATI
IIMA ICIT8A8IN ECI TIPENTAKOSIAK. ATISOKANAN 8ITAMAKEMAKANON
ACITC ATI ECISEK PIMATISI8IN, ATI KEKI ICISEIAN EKA TEP8ETAMAN
KEKON, ATI KE ICITCIKEIAN EKA KITCI NIKOTINANI8AK MA8ASAK E
PIMATISINANI8AK.

KIKINOAMAKE8IN ACITC ACO8I MIKI8E8IN

8ECKATC AKO MIKOTC ECITCIKANI8AKIPAN EPIMATISINANI8AK KITCI ACO8I MIKI8EIAN KA ICI KIKENTAMAN, MI PANIMA II E TOTCIKATEKIPAN KITCI KI PIMATIO8AN. KICPIN 8I KACKITO8AN KITCI PIMATCIO8AN, PANIMA KIKA KIKINOAMASONAN KITCI KICINATEIAN ATIK8AIAN, KIKA AKIMIKE, KIKA PONAPI, PANIMA ACITC KI PAK8ECIKANIKEIAN. OPIKIATC APINOTCIC, PANIMA KIKA 8APAMIK ANETOTCIKATEK, KAKIKINA8API MEKA KITCI KI ANI KIKENTAK. MI PANIMA E TOTCIKATEKIPAN KITCI KI PIMATCIONANI8AK.

KITCI TEP8EIEINIMAKANI8ITC A8IAK E KAKITA8ENTAK KONI KITCI ANICINPE, KA8IN MAMAKATC EPITATISITC ICI TIPAAKANI8ASINON. 8INA8A KITCI ANICINAPEK MI IKI KA ACO8I MIKI8E8ATC ATISOKANAN, ICITCIKANI8AK. 8INA8A OKI KANA8ENTANA8A KITICITCIKE8INAN.

APINOTCIC MEKA KITCI APITENIMAKANI8I, 8INIKAK ICI APACENIMONANI8ANI KITCI ACO8I MINAKANI8ITC MANATCII8E8IN, KA8IN 8IN KITCI KITCI TIPENIMAKANI8ITC. ONIKIIKOKAK MEKA ICI KIKINOAMASO8AK ATI KE TOTAMAN KITCI PIMATCIO8AN, TAPICKOTC

ONIKIIO8AN TOTANA8A E PIMATISI8AK, OKAKIKINA8APAMA8AN
ECITANTCIN KITCI KIKENTAK APINOTCIC KITCI KACKI PIMATCIITISOTC
NIKAN. KITCI KIKENTAK KITCI NTOTAK EKOTCIN ONIKIION. ONIKIION
TAC 8IN ICINAK8ANI KITCI 8ITAMA8ATCIN, KITCI MINOPINATCIN
OTAPINOTCICIMAN EKA MAMAKATC KITCI K8AK8E CAKOTCIATCIN. OKA
MANATCIAN TAC 8AA APINOTCIC OMANITOMAN KA TACI 8ITCIIKOTCIN.

KAIESIKOTC KI KITCI PAKANISE ECI PIMATISIAK APITC KA MATCI
TAK8AKIN ANICINAPE8AKIN. KA8IN ACA TEP8E APATASINON KE ICI
KIKENTAMAK NOPIKIM PIMATISI8IN, MI ETA ANI8AK ETA KEKON KITCI
KIKENTCIKATEK ICINAK8AN.KA8IN ACA ECI PIMATISIAK KIKI
APATCITOSINANAN KITCI KIKINOAMASO8AK. KA8IN KEKON ICIT8A8IN,
KA8IN KEKON KITCI 8ITCII8EMAKAK, KA8IN KEKON KITCI OCITO8AN
KITCI PIMATCIO8AN.

8ECKATC AKO KA8IN APITCI SOKAKONAKANI8ASINOPAN E
KIKINOAMAKANI8AK. KA AKO TAK8ICINO8ATC AKAMAKI8INNIK, ACITC
APITC KA MATCINAKANIO8ATC APINOTCICAK KITCI NTA
KIKINOAMASO8ATC, KI KITCI MAMITA8ENTCIKE8AK APINOTCICAK.

KOKI OTAPINIKATE ECITANI8AKIPAN

APITC AKO OCITCIKATEK « POW WOW », ACA KI KACKITONANAN KITCI KOKI NAKICKA8AIAK KI 8ITCI ANICINAPEMINANAK, ACITC KITCI MATINAMATIAK KIT ICIT8A8INAN. OSA MEKA, KAKINA KEKON KA MANATCITCIKATEK KA KITCI APITENTAK8AK, ACITC KA TIPENTAMAK KI MATINAMATIMIN. KA8IN ETA KITCI 8APATAIKATEK ANICINAPE ICIT8A8IN 8ETCI TAK8AK II « POW WOW ». KA8IN KEKON ATA8ANI8ASINON KONI KITCI MASINATESITCIKANI8AK. KAKINA KEKON ANICINAPE ECI KACKITOTC MATINAMATINANI8AN ACITC 8APATAI8ANI8AN II APITC. KAKINA PEPECIK KEKON 8APATAI8EMAKAN EPITCI MACKA8ISIMAKAK ANICINAPE ECI PIMATISITC.

APITC TAK8AK « POW WOW », KATA NAKICKOTATINANI8AN E 8APATAI8EMAKAK E OCKI NTA8IKIMAKAK EPITCI MIN8ASINATEKIN ANICINAPEK OPITCIKONAANI8A.

ANI KITCI OPEIMAKAN ECI KIKENTAK ANICINAPE, MANE INAKANEA8AN KIKENTAMO8INAN ACITC KIKINA8ATCITCIKE8INAN MOKIMAKANON, PEPAKAN ENAKANESI8ATC ANICINAPEK E MECKOTINAMATINANI8AK II

APITC. MISA APITC TAK8AK « POW WOW » ACITC KA
MATINAMATINANI8AK KIKENTAMO8INAN MI TAPICKOTC KA
MITCIMAPITEKIN ENENTAK8AK. KITCI KOKI MOKIMAKAK TAC 8ECKATC
KAPI 8ANIKATCIKATEK, PANIMA KI KOKI MIKITCIKATEK KITCI ANI MICAK
ECI KIKENTAMAK KITCI KOKI PIMATISIMAKAK ICIT8A8IN. INI TAC KA
OCITCIKATEKIN KITCI NAKICKOTATINANI8AK, ECKAM ANI
PAPAMATCIKEMAKANON KIKENTAMO8INAN ACITC MIKI8EMAKANON
KITCI MECKOTINAMATINANI8AK, E NAKICKOTATINANI8AK KITCI KOKI
MIKIKATEK KAKINA TAPICKOTC E 8ITCI ANICINAPE8INANI8AK.
KINIKA8INO8AK TAC PEPAKAN KA INAKANESI8ATC ANICINAPEK,
TATIPATCIMOTATI8AK PECAPECIK ECITCIKE8ATC MITAC AIACKOTC
MATINAMATI8AK ECI KIKENTAMO8ATC, KAKITA8ENTAMO8IN KA KITCI
MIN8ACIK ACITC EKA KACKI CAKOTCIIKATEK.

ANICINAPE NIMI8I PITCIKONAANAN 8ITAMAKEMAKANON E KITCI
INENTCIKATEK, E KITCI APITENTCIKATEK E ANICINAPE8INANI8AK, E
ANICINAPE INAKIMIKONANI8AK. APITC OCITO8ATCIN ACITC
KIKICKAMO8ATC INI PITCIKONAANAN, KA OCKINIKI8ATC OKOKI
MIKANA8A ATI 8ETCI8ATC, OKOKI OTAPINANA8A ATI ECI

TEP8ETAMO8APAN. ACITC ANI MOKIMAKANI O PIMATISI8INI8A ACITC E
PAKANISI8ATC. KA8IN MAMAKATC KITOSI8AK, MI ETA ICITA8AK KITCI
ANI NAK8ANIK ECINAKOSI8ATC. II8E TAC KA KOKI OTAPINAMO8ATC
8ECKATC ECITCIKE8APAN OTANIKE KITCI ANICINAPEMI8AN, KA KOKI
NIMI8ATC ACITC KA KOKI NIKAMO8ATC TE8EIKAN E APATCIA8ATCIN,
8ITAMAKEMAKAN KIAPATC E AIAMIAKANI8I8ATC MANITOK, E
MANATCITCIKATEK PIMATISI8IN TAPICKOTC NENA8ITC ATCIKATEK
KAKINA OOMA AKIK MITONENTCIKAN ACITC ECI TIPENTAKOSIAK.

KITCI MA8ASAK8INO8AK

AP8AMACI OCITCIKATEKIN ANICINAPE8AKIN, TAK8ANOPANIN
PECIKOTENA E MAWASAKO TACIKE8ATC NOPIK. MA8ASAK TAC KITCI
MINO TACIKANI8AK, PANIMA ONINAKANI8IPAN PECIK KE NIKANITC,
TCOTCO/IK8E KE NIKANITC TASIN PEPECIKOTENA, ONINAKANI8I KE ANI
NIKANENTAKOSITC. OSA KICPIN 8I PIMATCIONANI8AK, PANIMA
MA8ASAKO TACIKANI8ANOPAN. MA8ASAK KITCI MINO 8ITCIITINANI8AK
MI ECI TIPAAKANI8AKIPAN. TAPICKOTC KA 8ITOKOTATI8ATC
APINOTCICAK ACITC KITCI ANICINAPEK. TAPICKOTC KA
8ITOKOTATI8ATC KA KITIMAKISI8ATC ACITC KA 8ANATISI8ATC.
TAPICKOTC KA KITCI NAK8ITCIKATEK EKA KITCI KA8ASKATANI8AK.
KICPIN KITANIKE KITCI ANICINAPEMINANAK KACKI 8ITAMAKE8APAN MI
KE IKITO8APAN : MI PANIMA II KE TOTCIKATEK, MI MEKA ECI
PIMATISINANI8AKIPAN. KAKINA PEPECIK A8IAK APATISI KITCI
PIMATCIONANI8AK. NAPEK 8INA8A, NTAOOPANIK, ANOKIPANIK,
8INA8AKAK ICI TIPAAKANI8ANOPAN KITCI PIMATCIONANI8AK ACITC
KITCI MANATCIATCIN O PECIKOTENAM. TASOKACIK O8ITCIKON ECI
MIKITAK KITCI MIN8ENIMOTC KONI KITCI INENTAK ECITATC.

TASIN PEPECIKOTENA, TE8AK IK8E8AK, TCOTCOK E NIKANI8ATC. 8INA8A
NIKANI8AK APITC KIN8EC MATCA8ATC ANOKI8INNIK. 8INA8A
OTIPENTANA8A KAKINA KEKON. KIKINOAMAKE8AK, ONACO8E8AK.
OTOCIA8AN PAK8ECIKANAN KITC KICIS8A8ATCIN OPECIKOTANAMI8AN
KITCI ACAMA8ATCIN. ONAKATCIA8AN KAKINA A8IAN KITCI MINO
PIMATISINTCIN, OMIKITANA8A APITC OTCI KICI8AITINANI8AK ACITC
OMINOPITONA8A KAKINA KEKON KITCI MINOSENİK. KAPE KICIK
ONAKATCIAN KAKINA O TCINA8EMAKANAN EKA KITCI NIKOTCINTCIN.
MISA8ATC E TIPIKANİK, OMIKIMAN KAKINA. KITCI KOKOMAK KA
MITASOMITANA8E PIPONESINTCIN ACITC KA OCKI IK8E8INTCIN.

8ECKATC AKO, KINA8IT TIPINA8E KI MIKIMITISONANAPAN. NIPAKANİKAK
ICI AKOSI IK8E KITCI NTA8İKINTCIN OTCITCICIMAN. MA8ASAK
PEPECIKOTANE 8ITOKOTATIPANİK. NANİKOTIN KITCI AK8AIATC
TAK8ANOPAN MITCIM. KI ANIKO MIKI8ANI8AN MEKA ECI
KIKENTCIKATEK. TIPENTISONANI8AN KE INENTAMAN.
TIPENTISONANI8AN KE ICITANI8AK. PEKIC ETA KITCI PIMATIONANI8AK
ICI MIK8ENTCIKATE.

ECI PECIKOTE8ISIAK MI II NENA8ITC ECI TAK8AK KA INAKANESIAK E
ANICINAPE8ISIAK. MI II KA NOSONEAMAK KITCI OCITO8AK KE
INATISIAK. KAKINA 8ACAKAM PECIKOTENA TAC KI APATAN KITCI ANI
MICAQ, KITCI ANI MANEIAK E ANICINAPE8IAK.

MI KAKINA ECISEKIPAN AP8AMACI KA 8APISITC KA8I
ICINAKOSI8AKANI8ITC ANICINAPE, AP8AMACI KIKINOAMATI
MIKI8AMIKAK KA ICI8INAKANIO8APAN APINOTCICAK. KEKAPITC KEKON
KI PIKOSE, KI KAKATCISE.

ICIKIC8E8IN

ICIKIC8E8IN KAKINA KEKON KI 8ITCIKATE : PIK8ATINAN, SIPIN, MITIKOK, MINAN KA MITCIKATEKIN KONI EKA KA MINOCKAKEMAKAKIN, ACITC E KONIPI8AK, E NIK8ATCASAK, E KI8ETIK, E KOTATCI NO8EK, E AN8ATIK. APITC E KICEPA8AKAK KONIKOTC APITC 8I ANI TIPIKAK. ICIKIC8E8IN KAKINA KEKON OKI 8ITAN, OOMA AKIK ACITC ANICINAPE ENENIMOTC.

KITCI 8ECKATC ICIKIC8E8INAN MAIA INITAK8ANOPANIN 8A IKITONANI8AKPAN, MAIA ACITC KI 8APATAN ECINIKATEK KEKON. KAKINA KEKON 8ITCIKATE.

MI PANIMA ANICINAPE E APATCITOTC OTICIKIC8E8IN KITCI NOTCIKATENIK ACITC KITCI MINOTAK8ANIK. MI MAIA PITIKAMIK KIKOTACK8AKAK ACITC KI MISATAKAK KA PIT8E8ITAMOMAK8AK. MI MAIA KA OCKAK AKI ENENTAK8AK ICIKIC8E8IN PANIMA TAC KATA OPENIKATE TAPICKOTC E NOTIK KITCI OPEIMAKAK. MI ACA ENI TAIK, 8ITCIKATE KA MIN8ACIK, KA TEP8EMAKAK, ECISEK PIMATISI8IN. KI

KANA8APATANANAN TAC KINA8IT KIT ICIKIC8E8INAN E KITCI
APITENTAK8AN.

KIT APATCITONANAN E MINOTAK8AKIN IKITO8INAN KITCI 8ITCIKATEKIN
KA ICI TACIKANI8AK ACITC ATISOKANAN. KAKINA PEPECIK KIT
ICIKIC8E8INAN INAKANEA KIT ANICINAPE8ATISI8INAN. KIT
APATCITONANAN KA MINOTAK8AKIN IKITO8INAN, KA ICINAMAK KEKON.
MI MEKA ENAPATAK E NISITOTAK8AK KEKON TEP8E 8I IKITONANI8AK.

KITANICINAPE ICIKIC8E8INAN TIPATCIMOMAKAN KAPI INENTCIKE8ATC
8ECKATC KITANIKE KITCI ANICINAPEMINANAK KAPI PIMOSATAMO8ATC.
KA8IN PEKIC KACKITCIKATESINON KAKINA OCKI KEKONAN NOKOM KITCI
8ITCIKATEKIN, OSA KITCI 8IPATC INI ATCISE KEKON.

KA8IN 8IKAT OTCI OCIPIIKATESINON ANICINAPEMO8IN, ACITC KA8IN
MANESI A8IAK E NAPO8ATAK ANICINAPE ICIKIC8E8IN. E 8ITCIKATEK,
ACITC ENAPATCITCIKAKEK KEKON KI 8ITCIKATE. KA8IN MEKA
INENTAK8ASINOPAN OCIPIIKAN KITCI APATAK, TIAKOTC KITCI
NIKAMONANI8AK ACITC KITCI ANIM8ANI8AK ETA KI OTCI TAK8AN
KITICIKIC8E8INAN. KIAPATC NOKOM KITCI APATAN II NIKAMO8IN ACITC

ANIM8E8IN. NOKOM OCIPIIKE8IN APATAN KITCI 8ITAMAKANI8AK
8ECKATC ANICINAPE PIMATISI8IN, KAKINA KAPI KACKITOTC E
PIMATCIOTC NOPIMIK. TASIN IKITO8IN MAIA SOKAN TEP8E IKITO8IN.

KAPI APITAI8AK

KA8IN KIT INENTAKOSISIMIN KITCI TIPENTAMAK E ANI APITAI8AK, KA8IN 8ECKATC TAK8ASINOPANIN, TIPEIKANES, TIPEIKANESAN KONI PISI TIPEIKANESAN. MI ETA 8ITCIKATEPAN AKO E KICIKAK, E TIPIKAK KONI E ANI APITAI8AK, ACITC E NTA8IKINANI8AK PINICI KITCI NIPONANI8AK. KA8IN ACITC APATISISIPAN KISISOKAN 8ECKATC. E ANI OTCITCISEK KE ICITANI8AK ICI TIPAAKANANI8ANOPAN. NA8ATC KIN8EC KIKA PIMOTE APITC APINOTCICAK 8ITCI8AT8A. ATI E ANI TANI8AK MI KE ICI OCIKEIAN. MI MANE A8IAK ECINIKATAMO8ATC : ANICINAPE OTIPAIKAN (indian time).

II ANICINAPE OTIPAIKAN, NA8ATC PEKATENTAK8AN ACITC NA8ATC KIN8A. MITAC ECI SAKAK8EMAKAK INATISI8IN KA PAKANISI8ATC KOTAKIAK A8IAKOK. 8I CAKOTCII8EMAKAN TAC NOKOM PIMATISI8IN; NANTAM KEKON E8I MANINIKATEK ACITC NANTAM KEKON E8I ATCIKATEK E PIMATISINANI8AK. KAKINA KAPI ATISOKANI8AK, 8ITAMAKEMAKAN MA8ASAK E PIMATISIAK, 8ECKATC, NOKOM ACITC NIKAN KE ANI ICI PIMATISIAK. OSA MEKA KAKINA KEKON KA ICISEK, MISA8ATC KITCI AKACINOCOK OOMA AKIK, NAK8AN KE ANI ICISEK

NIKAN. 8ATAN KA NANISANAK KA PACKITEK 8ETI NIPICIKE8INNI OTAKI
KONIKOTC OOMA MONAIKANAN, KATA ATCISENI KE ANI PIMATISI8ATC
NIKAN KIT APINOTCICIMINANAK.

MIKANA

8ECKATC PIMATISI8IN 8ITAMAKEMAKAN KAPI SOKI ATCISENIK
ANICINAPE O PIMATISI8IN; 8ATAN 8ECKATC PAPAMATCIKANI8ANOPAN,
NOKOM TAC PECI8AN ICI TACIKANI8AN. 8ECKATC AKO KINA8IT
TIPINA8E KI KACKI PIMATCIONANAPAN, NOKOM TAC PANIMA KI
PIMATCIIKOMIN. 8ECKATC AKO KI KITCI INENTANANAPAN E
ANICINAPE8IAK, NOKOM TAC AKATCI8IN KIKI MINIKOMIN. II
ENATISOKASO8AK, KI OCIIKATE, KA8IN KACKITCIKATESINON KITCI
KASIIKATEK. MI ETA TAK8AN KITCI MIK8ENTCIKATEK EKI PI
TAK8ICINO8ATC KOTAK A8IAKOK PAKAN KA INAKANESI8ATC. KAKINA
KEKON OKI NICI8ANATCITONA8A.

PANIMA KI MIKOTCIKATEK EKA E KACKITCIKATEK PAKAN INENTAMO8IN
KITCI NAKICKOTATIMAKAK.

II KA TIPATCIMONANI8AK 8ITAMAKEMAKAN ATI A8IAK ECI MACKA8ISITC
MISA8ATC 8ISAKENTAMIAKANI8ITC KONI E 8ANITOTC OTICIT8A8IN.
MISA8ATC O KACKITON KITCI KOKI PASI8ITC KIAPATC KITCI TACI
SOKIKAPA8ITC, KIAPATC KITCI KOKI MIKAK OMIKANAM.

KI 8APATANANAN EPITCI MIN8ACIK PEPAKAN ATI ECI PIMATISIAK, ACITC
ACA KIT OTISAPATANANAN KITCI NAKICKOTATIMAKAKIN KIT
ICIT8A8INANAN. MI KEKINA8IT ECI ACITCINO8AK KITCI MAMA8ISEKIN
KIT ICIT8A8INAN. MI KONI KE ANI MINOSE OCKI PIMATISI8IN MA8ASAK
KITCI MINO TACIKEIAK.

ANICINAPE KE8IN ACA ANI MINOKAPA8I E8I OTAPINAK E8I MECKOTONAK
ATI ECI KIKENTAK OKIKENTAMO8IN. NE8AT TAC NA8ATC KATA MINOSE
KITCI MINO NAKICKOTATIMAKAKIN KIT ICIT8A8INANAN NIKAN.

- MI II KAKINA -